

## 2 Pita

**Te launiu hakarua Pita e taataa**  
**Na hakataakoto hakamattua i roto**  
**te launiu nei:**

Na tattara kaamata *1.1—1.2*

Tiputipu taualleka na hakattina ana *1.3—1.11*

Te taku Pita *1.1—1.21*

Na tama seai ma ni tama hakamaoni e akoako  
*2.1—2.22*

Te hamai hakaoti Krai *3.1—3.10*

Na tattara hakaoti *3.11—3.18*

<sup>1</sup> Anau Saimon Pita, anau he tama hehekau, ia he aposol Jisas Krai.

Anau e taataa atu i kootou na tama e ttonu tahi tera ni too na hakattina haimmahi peenei ma na hakattina maatou nei i na mahi TeAtua ia ma taatou Tokonaki Jisas Krai raa.

<sup>2</sup> Na illoa kootou i TeAtua ia ma Jisas TeAriki taatou raa ki kou atu te tauareka ia ma te noho laoi se isi te hakaoti.

*Te kanna ia ma te hirihiri TeAtua*

<sup>3</sup> Na mahi haimmahi TeAtua raa e kou mai taatou na mee hakaatoa taatou e hihhairaa, ma ki lavaa taatou te noho na ora te lotu hakamaoni i te atamai taatou i te Tama tera nikanna taatou kinnoho i roto na mahi ia ma na tiputipu taualleka Aia raa.

<sup>4</sup> Teenei hea Tama raa nikou mai na hoki ellahi, ia esuimmaha tera Aia nitattara mai i mua raa. Tena na hoki nei elavaa te tokonaki kootou ki hakassao itaha ma na tiputipu haeo i te maarama nei raa, tena ku o mai ki noho i roto na mahi haimmahi TeAtua raa.

5 Iroto te hakataakoto nei kootou ki hai na mahi kootou kitoo tetauareka raa iroto na hakattina kootou, tena na taualleka kootou raa e me ki kou atu te iroa,

6 tena na illoa kootou raa e me ki kou atu te noho hakavaratoa, tena te noho hakavaratoa raa e me ki kou atu te pasemmu, tena te pasemmu raa e me ki kou atu na tiputipu taualleka hakaatoa,

7 tena na tiputipu taualleka raa e me ki kou atu te hakamaoni na tiputipu te lotu, tena na tiputipu te lotu raa e me ki kou atu te laoi.

8 Teenei na tiputipu kootou e tau te isi, ia kame kootou e isi hakamaoni na tiputipu nei, tena na tiputipu nei e me ki mee kootou ki mataora, ia ki hakanuu na illoa kootou iaa Jisas Krai TeAriki taatou raa.

9 Emeia kame kootou se isi na tiputipu taualleka nei iroto kootou, tena kootou e me ki ssau pera ma na tama selavaa te kkite i mmao raa, tena kootou selavaa te kkite, ia e me ki ssiri ma kootou ku oti te ssorohia no matahua i taha ma na hai sara kootou i mua raa.

10 Ia tena aku taina, kootou ki hai na mahi kootou ki mee te kanna ia ma te hirihiri Aia raa ki haimahi iroto kootou; kame kootou etoo te hakataakoto nei, tena kootou selavaa te tiaki na hakattina kootou raa.

11 Kame kootou etauttari, tena kootou e me ki isi na mahi roo hakaatoa ki uru i te Hakamaatua ana TeAriki ia ma te Tokonaki taatou Jisas Krai raa.

12 Ia tena anau e me ki hakailloa atu kootou i na mee nei, niaina ma kootou ku oti te illoa na mee nei, tena kootou ki ttuu mau roo i te hakamaoni kootou ni too raa.

<sup>13</sup> Anau e hakataakoto ma etonu anau ki tataaraki na kapuroro kootou raa ma na tiputipu nei te saaita nei anau koi ora.

<sup>14</sup> Anau e iroa pera ma se roroa anau ku mate, e ssau pera ma TeAriki Jisas Krai nitattara hakamatahua mai anau raa.

<sup>15</sup> Tena anau e me ki hai na mahi anau ki sese he ara ki tokonaki kootou ki mannatu na mee nei na vahao hakaatoa te saaita anau ku mate raa.

*Krais e hakamaahina na ora taatou*

<sup>16</sup> Maatou semee ma etuunaki na tattara na tama e hatuhatu raa ki hakailloa ake na tama i te vakkai mai muri ia ma na mahi TeAriki taatou Jisas Krai raa. Maatou ekkite roo ma na karemata maatou na mahi Tama raa.

<sup>17</sup> Maatou e nnoho i te kina raa te saaita TeAtua Tamana ni kou ake te hakammaha ia ma na mahi Tama raa, te saaita tere o i te Maahina i te Kina Hakanaaniu raa nitattara iho ma, "Teenei ko te Tamariki hakamaoni Anau, tena Anau e hihia roo i Aia."

<sup>18</sup> Maatou hokomaatou ellono tere o raa e tattara iho i te vaelani te saaita maatou ni nnoho ma Tama raa i aruna te mouna e tapu raa.

<sup>19</sup> Ia tena maatou e illoa hakamaoni na tattara na profet raa nitattara mai raa. Kootou e me kittonu hakamaoni kame kootou etauttari na tattara raa, maitaname na tattara raa e ssau pera ma he ahi e hakamaahina i te kina e pouri raa ki tae te saaita te ata raa ku haere ake, tena tetapao raa e me ki hakamaahina i roto na hatu manava kootou.

<sup>20</sup> Tena iaruna na mee hakaatoa, kootou ki mannatu pera ma se hai tama maatou e lavaa te hakamaarama atu na tattara i roto te Launiu Tapu.

<sup>21</sup> Maitaname se haitama e tattara na tattara TeAtua raa ina hakataakoto koi te tama, e meia TeAnana Tapu e hakattaki na tama naa ki tattara na tattara e oo mai TeAtua raa.

## 2

### *Na tama seai ma ni tama akoako hakamaoni*

<sup>1</sup> Na profet malliu raa ni hakahhura iho imua iroto nakanohenua, ia essau hoki ma te saaita nei, na tama seai ma ni tama hakamaoni ki akoako raa e me ki hakahhura mai iroto kootou. Na tama naa e me ki tattara atu na tattara malliu ki mee na ora na tama ki haeo, na tattara ite hakamarumaruru se hakamaoni raa e me ki mee kootou ki se hakattina ite Tama Hakamaatua tera nitaau i laatou itaha ma na haisara raa, tena na tama naa e me ki mee laatou hokolaatou ki hakateki no haeo.

<sup>2</sup> Ia tena tammaki na tama e me ki tauttari na tiputipu sakkino na tama raa; maitaname hea na tama raa e ppena raa e me ki mee alaa tama ki tattara haeo i na tiputipu te hakamaoni.

<sup>3</sup> Na tama seai ma ni tama hakamaoni e akoako raa e mannako, tena laatou e me ki too na sileni i na tattara malliu laatou e hatuhatu raa. Emeia te saaita nei ku roroa, tena te Tama e me ki hakatonutonu na tama raa ku tanattana, ia te Tama e me ki kou ake te haeo na tama raa ku maahuru mai!

<sup>4</sup> TeAtua se hakasao na ensel e haisara raa, e meia Aia e me killeto na tama raa ite kina te ahi raa, tena na tama naa e me ki nnoho karapusi ite kina epouriraa no hakattari te Aho te Hakatonutonu raa.

<sup>5</sup> TeAtua se hakasao te maarama i mua raa, e meia Aia e kou ake te tai uu ki loohia

te maarama na tama se illoa TeAtua raa; na tama koi Aia e tokonaki raa ko Noa, te tama e takutaku na tiputipu e ttonu raa ia ma tokohitu alaa tama.

<sup>6</sup> TeAtua e kou ake na hakalono llihu i na matakaina Sodom laaua ma Gomora. Tama raa ettuni na matakaina raa ma teahi, tena erua na matakaina raa eme ki huri mai kikkite na tama se hakattina i TeAtua raa hea e me ki kapihi ake i laatou raa.

<sup>7</sup> TeAtua e hakasao Lot, he tama e tonu, tena tama raa e kkaroo na tiputipu sakkino na tama se hihhai ki tauttari na tuaa raa.

<sup>8</sup> Lot he tama tauareka enoho ma na tama sakkino, tena teaho ma teaho aia e hakalono llihu koi inamee aia ekite na tama raa e ppena raa ia ma hea aia e rono raa.

<sup>9</sup> Ia tena TeAtua eiroa teara Aia eme ki hakasao na tama e hakattina Aia raa itaha ma namee sakkino e hahaaite laatou raa ia ma teara Aia eme ki karapusi na tama sakkino raa ma na hakalono llihu ki tae roo te Aho te Hakatonutonu raa,

<sup>10</sup> taohi mua na tama tera e tauttari na tiputipu sakkino inatinotama laatou raa, tena kipeesia na mahi TeAtua raa itaha.

Na tama sei ma nitama hakamaoni e akoako raa semattaku, ia e hakatapanatta, tena na tama naa sei i na hakammaha laatou i na tama hai mmahi i aruna raa; e meia na tama naa e hai na haeo na tama raa.

<sup>11</sup> Niaina na ensel e ivi tera e hai mmahi i aruna na tama sei ma nitama akoako hakamaoni raa, na ensel selavaa te haru na haeo na tama raa i mua na karemata TeAriki.

<sup>12</sup> Na tama nei e ppena hea te tinotama raa e hihai, tena laatou essau pera ma

ni manu kai ttama e hannau mai ki taaiaria ki mmate. Na tama nei e tattara haeo i na mee laatou se illoa raa. Tena laatou e me ki taaiaria ki mmate pera ma na manu kai ttama raa,

<sup>13</sup> tena na tama nei e me ki too na hakalono llihu pera ma nitaau i laatou. Na tama nei e hihhai ki ppena na mee hakaatoa ite maarama raa kitau ma hea na tinotama laatou raa e hihhai, ia na tama nei e hakannapa, ia e haeo tesaaita laatou ennoho ma kootou no kkai raa; na tama nei ennoho hihhia ma na tiputipu sakkino laatou raa!

<sup>14</sup> Na tama nei se hai mee peeraa hoki e hihhai, na tama nei e hihhai koi ki karemata kailallao, ia na tama nei se ppohe te ppena na hai sara. Na tama nei e hakattaki na tama na hakattina laatou raa e matanaenna e raa i roto te taaiki. Na hatu manava laatou raa e akoako ria ki kai mannako. Na tama nei ennoho iraro na haeo TeAtua e tuku raa!

<sup>15</sup> Na tama nei ku tiaki te ara e tonu raa, tena ki oo nollano itaha ma te ara raa; na tama nei e tauttari te mateara Balam, te tamariki Beor raa ni tautari, e mee te tama raa e hihai ki too na sileni i na mee se ttonu aia e ppena raa.

<sup>16</sup> Emeia TeAtua e hai ake tama raa i na hai sara aia raa. Te donki Balam raa e tattara pera ma he tama no hakamau na hakataakoto e vvare tama raa e ppena raa.

<sup>17</sup> Na tama nei e ssau pera ma na kina na vai ku pakuppaku raa, ia e ssau hoki pera ma na pukureurehu e aania ria te matani raa; TeAtua ku oti te tuku te kina na tama naa i te kina e pouri roo.

<sup>18</sup> Na tattara na tama nei raa ni tattara ahua hu,

ia ni tattara vware koi, na tama nei e huri ake na tiputipu sakkino tetinotama raa e hihai ma kittaiki na tama tera ku kaamata kihuro itaha ma na ora haeo laatou ni nnoho mai i mua raa.

<sup>19</sup> Natama e akoako na malliu laatou raa e tattara malliu ma natama eme kitoo tetauareka, e meia laatou hokolaatou ennoho ma na tiputipu sakkino, maitaname taatou e tauttari na tiputipu sakkino tera e kou mai na haeo taatou raa.

<sup>20</sup> Kame te atamai natama Te Ariki ia ma te Tokonaki taatou Jisas Krai raa emee laatou no huro itaha ma na tiputipu sakkino i te maarama nei raa, tena ki oti laatou ku ppena hakaraoi na tiputipu sakkino raa, tena te haeo natama naa eme kitoo tesaaita hakaotiraa eme ki haeroo, ia eme kiraka iaruna ma te kaamata.

<sup>21</sup> E me ki tauareka roo ma laatou kame laatou ni se illoa mai na tiputipu e ttonu tahi raa. E haeo ma laatou ki illoa na tiputipu e ttonu tahi raa ki oti laatou ku huro muri itaha ma na tattara e ttapu laatou ni llono raa.

<sup>22</sup> Hea e kapihi ake i na tama raa e huri ake pera ma na tattara hurihuri nei e hakamaoni:

“Te poi raa eme ki vaakai no kai na rua aia ni rua raa”,

tena

“te piki ku oti te hakoukouria no matahua raa eme ki vaakai no hakatupetupe i roto na peela.”

### 3

*Te Ariki e me ki vaakai mai hakaraoi*

<sup>1</sup> Aku soa laoi roo, teenei te hakarua na launiu anau e taataa atu i kootou. I roto erua na launiu anau raa, anau e hahaivi ma ki hakamaarama na kapuroro kootou raa ma na hakataakoto taualleka, tera hea anau e tattara atu hakaraoi i na mee nei.

<sup>2</sup> Anau e hihai kootou kimannatu na tattara na profet e ttapu TeAtua i muaraa ia ma na tattara hoki TeAriki te Tokonaki taatou tera na aposol raa ni tattara atu kootou raa.

<sup>3</sup> Te mee kaamata, kootou ki illoa pera ma te saaita na aho hakaotioti raa, e isi na tama e me ki oo atu, e me ia na ora na tama naa e me kilepotia i na mee sakkino laatou e hihhai raa. Na tama naa e me ki taussua kootou,

<sup>4</sup> ia e me ki vahihhiri atu ma, "Jisas e tattara hakamaoni pera ma Aia e me ki vaakai mai ma sei? Kaa teehee Aia naa? Na tipuna taatou raa kuoti te mmate hoki, e me ia na mee hakaatoa e mmoe koi pera ma i mua te saaita TeAtua ni pena iho te maarama nei raa!"

<sup>5</sup> Na tama naa e illoa, e me ia laatou e hihhai ki tiaki te hakamaoni raa pera ma TeAtua e ppehi koi te tattara, tena te vaelani ma te maarama nei ku ttipu ake. Te maarama nei e tipu ake i lottonu te moana, ia e pena i te vai,

<sup>6</sup> ia teenaa ko te vainaa koi te tai u raa ni hamai no seu te maarama i mua raa.

<sup>7</sup> E me ia te vaelani ia ma te maarama nei e mmoe i na rima TeAtua kittuni ki ura. Te vaelani ia ma te maarama nei e mmoe kittae te aho na tama se hakattina TeAtua raa e me ki hakatonutonu ria, tena ku seu ria.

<sup>8</sup> Aku soa laoi roo, auu sessiri te mee hokotahi nei! Te aho hokotahi raa se kee ma simata

na hetau i na karemata TeAtua. Tama raa e kite pera ma te aho hokotahiraa e ssau koi pera ma simata na hetau.

<sup>9</sup> TeAtua selavaa tennahe teppena hea Aia e hakataakoto kippenaraa, ia pera ma alaa tama kame e hakatataakoto raa. Emeia Aia e varatoa roo te noho ma kootou, maitaname Aia se hihai ma na tama ki haeo, tena Aia e hihai ma na tama hakaatoa kittike itaha ma na haisara laatou raa.

<sup>10</sup> Emeia te aho TeArikiraa e me ki hamai pera ma hetama kairarao. Iroto te aho naa, te vaelani raa e me ki hakateki no sei, tena na mee hakaatoa i te vaelani raa e me ki vvelahia no haeo, tena te maarama nei ia ma na mee hakaatoa e me ki oti.

<sup>11</sup> E mee na mee hakaatoa e me ki hakaotiria peenei, kaa he ora peehee kootou e tau te isi? Kootou ki mee na ora kootou raa kittapu, tena ku tauttari hakamaoni TeAtua,

<sup>12</sup> te saaita nei kootou ki nnoho no hakattari te Aho TeAtua e me ki hamai no hakatonu tonu raa e tae mai, tena kootou ki hai na mahi kootou ki mee te aho raa ki tae mai vave, teenaa ko te aho te vaelani raa e me ki vvelahia no haeo, ia te vvela raa e me ki mee na mee hakaatoa i te vaelani raa ki hhonu pera ma he vai.

<sup>13</sup> Emeia maatou e hakattari koi hea TeAtua ni tattara hakamaoni mai i te vahi te vaelani ia ma te maarama vahao nei tera na tama e ttonu tahi raa e me ki nnoho raa.

<sup>14</sup> Aku soa laoi roo, te saaita kootou e nnoho no hakattari te aho naa ki tae mai raa, kootou ki hai na mahi kootou ki ttonu, ia ki se hai ssara i mua na karemata Tama raa, tena ku nnoho laoi ma Tama raa.

<sup>15</sup> Kootou kikkira ake te varatoa TeAriki e isi ki kou atu kootou he saaita ki tokonaki ria no ora essau hoki pera ma Pol, tesoa taatouraa nitaataa atu ikootou ma teatamai TeAtua ni kou ake aiaraa.

<sup>16</sup> Teenei hea Pol etaataa iroto nalauniu aiaraa hakaatoa te saaita aia nitattara aturaa. Eisi natattara ehainatta iroto nalauniu aia tera natama ehakatapanatta iama natama na ora settonuraa ehakamamaarama huri natattaraa, essau hoki pera ma alaa tattara iroto te Launiu Tapuraa. Tena natamaraa e tuku koi te haeo laatou hokolaatou.

<sup>17</sup> Emeia kootou na soa laoi maatouraa ko na illoa roo name nei. Kootou ki hakamattonu, kiselavaa natama se hailouraa te hakattaki kootou ite ara esara nomaoha itaha ma na hakattina taualleka kootouraa.

<sup>18</sup> Emeia kootou kitauhano nonnoho ma na mahi iama te atama TeAriki te Tokonaki taatou Jisas Kraisraa. Taatou ki hakammaha Tamaraa te saaita nei iama na saaita hakaatoa. Amen.

**Nukumanu**  
**The New Testament in the Nukumanu language of**  
**Papua New Guinea**  
**Nupela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

---

PDF generated using Haiola and XeLaTeX on 18 Apr 2025 from source  
files dated 22 Mar 2023

54439682-f8e2-586d-98e1-295d02f74287